



## “IBADAH ZAKAT DIHAYATI, KEMISKINAN DITANGANI”

الْحَمْدُ لِلَّهِ الْقَائِلِ: وَأَقِيمُوا الصَّلَاةَ وَآتُوا الزَّكَاةَ  
وَارْكَعُوا مَعَ الرَّاكِعِينَ.

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ  
وَأَشْهَدُ أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ  
وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ  
أَجْمَعِينَ. أَمَّا بَعْدُ، فَيَا أَيُّهَا الْمُسْلِمُونَ! اتَّقُوا اللَّهَ،  
أَوْصِيَكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ. قَالَ  
اللَّهُ تَعَالَى: يَا أَيُّهَا الَّذِينَ ءَامَنُوا اتَّقُوا اللَّهَ حَقَّ تَقَاتِهِ  
وَلَا تَمُوتُنَّ إِلَّا وَأَنْتُمْ مُسْلِمُونَ.



## Sidang Jumaat yang dikasihi Allah sekalian,

Saya menyeru seluruh jemaah yang hadir pada hari ini, agar menjadikan taqwa sebagai agenda utama dalam kehidupan kita di muka bumi Allah ini. Dengan taqwa itu, Allah S.W.T menjanjikan kepada kita kejayaan yang hakiki di dunia dan di akhirat.

Tajuk Khutbah hari ini ialah ***Ibadah Zakat Dihayati, Kemiskinan Ditangani.***

## Sidang Jumaat sekalian,

Antara ciri-ciri insan bertaqwa ialah setia melaksanakan apa jua suruhan dan perintah dari Allah S.W.T tanpa banyak persoalan walaupun terpaksa menjadikan harta dan jiwanya sebagai gadaian demi mencapai ketaqwaan kepada Allah S.W.T. justeru itu, Allah akan membayar segala gadaian nyawa dan harta mereka dengan keredhaan dan nikmat syurga yang tidak ternilai harganya. Firman Allah Subhanahu Wa Taala, dalam Surah As-Soff, ayat 10 :

يَأَيُّهَا الَّذِينَ ءَامَنُوا هَلْ أَدُلُّكُمْ عَلَىٰ تَجْرَةٍ تُنَجِّكُمْ مِّنْ  
عَذَابِ أَلِيمٍ ﴿١٠﴾ تُوْمِنُونَ بِاللّٰهِ وَرَسُوْلِهِ ؕ وَتُجَاهِدُونَ  
فِي سَبِيْلِ اللّٰهِ بِأَمْوَالِكُمْ وَأَنفُسِكُمْ ذٰلِكُمْ خَيْرٌ لَّكُمْ إِن  
كُنْتُمْ تَعْمَلُونَ ﴿١١﴾



Wahai orang-orang yang beriman! Mahukah Aku tunjukkan sesuatu perniagaan yang boleh menyelamatkan kamu dari azab seksa yang tidak terperi sakitnya? Iaitu, kamu beriman kepada Allah dan RasulNya, serta kamu berjuang membela dan menegakkan agama Allah dengan harta benda dan diri kamu; yang demikian itulah yang lebih baik bagi kamu, jika kamu hendak mengetahui (hakikat yang sebenarnya).

### **Sidang Jumaat yang dikasihi Allah sekalian,**

Ibadah zakat merupakan lambang kesempurnaan Islam. Islam bukan sekadar agama yang menitikberatkan perkara ibadah khususiah semata-mata tetapi Islam merupakan peraturan kehidupan yang memelihara keadilan dan kebajikan seluruh manusia. Bukan hanya kepada umat Islam bahkan kasih sayangNya meliputi seluruh makhluk di muka bumi Allah Taala ini.

Antara bukti-bukti keadilan Islam ialah dengan tuntutan berzakat yang bertujuan supaya golongan yang berharta menunaikan tanggungjawab mereka kepada golongan fakir miskin serta asnaf yang berhak menerimanya. Sesungguhnya agihan zakat menyumbang kepada peningkatkan taraf sosial, ekonomi, pendidikan, kerohanian dan jatidiri umat Islam.

Di dalam sejarah kegemilangan Islam, ketika di zaman pemerintahan Khalifah Umar Bin Abdul Aziz yang berpusat di kota Damsyik telah berjaya menzahirkan keindahan Islam dalam meningkatkan amalan berzakat. Sejarah telah mencatatkan kehebatan pengagihan zakat di zaman itu yang telah berjaya menangani kemiskinan sehingga tiada lagi orang miskin di Kota Damsyik dan melangkaui batas sempadan negeri-negeri di Benua Afrika.



## **Sidang Jumaat yang dikasihi Allah sekalian,**

Pelbagai strategi dan tindakan perlu dilakukan demi memastikan wang zakat dapat dimanfaatkan sebaik mungkin oleh para asnaf zakat. Sesungguhnya, gerakkerja pengagihan zakat di Negeri Selangor sentiasa ditingkatkan dari setahun ke setahun. Semenjak tahun 1995 sehingga kini, Lembaga Zakat Selangor, telah mengagihkan zakat kepada 8 golongan asnaf yang berhak melalui pelbagai bentuk bantuan. Usaha tersebut telah berjaya membantu para asnaf untuk meningkatkan taraf hidup mereka ke arah yang lebih baik.

Di sebalik usaha mengagihkan zakat, sebenarnya ia bukanlah kejayaan yang hakiki, kerana cabaran yang paling hebat ialah bagaimana dengan bantuan zakat ini mampu memberi impak yang maksima menangani kemiskinan di negeri ini seterusnya mampu meningkatkan taraf ekonomi golongan asnaf.

## **Sidang hadirin sekalian,**

Semua pihak perlu berperanan untuk meningkatkan keupayaan ekonomi dan taraf kehidupan umat Islam di negeri ini. Disamping peranan institusi zakat untuk memperkasa taraf hidup ummah, pihak kerajaan, swasta, NGO dan institusi dakwah dan kebajikan wajar seiring dalam usaha murni tersebut.

Selain itu, pemerksaan jati diri para asnaf zakat perlu dipupuk dan dipertingkatkan dari semasa ke semasa demi melahirkan jiwa insan yang teguh dan sentiasa bermotivasi untuk berusaha gigih demi mengangkat taraf kehidupan mereka ke arah yang lebih baik. Sikap berdikari dan proaktif tanpa



bergantung harap kepada bantuan zakat semata-mata adalah merupakan tuntutan Islam sepertimana firman Allah S.W.T di dalam surah Ar- Ra'du, ayat 11 :

قَالَ  
إِنَّ اللَّهَ لَا يُغَيِّرُ مَا بِقَوْمٍ حَتَّىٰ يُغَيِّرُوا مَا بِأَنْفُسِهِمْ



*Sesungguhnya Allah tidak merubah keadaan sesuatu kaum sehingga mereka merubah keadaan yang ada pada diri mereka.*

Prof Dr. Yusof Al-Qardhawi berpandangan dalam bukunya bertajuk 'Bagaimana Cara Islam Menyelesaikan Masalah Kemiskinan' menyatakan;

*"Fungsi zakat bukan seperti suntikan penenang yang boleh meringankan derita untuk beberapa saat tetapi sebagai ubat penyembuh yang boleh membasmi penyakit sehingga akar umbi".*

Sesungguhnya usaha menangani kemiskinan hingga ke akar umbi bukanlah satu tugas yang mudah. Ia tidak dapat diselesaikan secara individu melainkan dengan usaha dan tenaga secara bersama. Melalui pemusatan wang zakat kepada institusi amil, pelbagai manfaat bantuan dapat disalurkan secara menyeluruh kepada golongan yang berhak.

Bantuan-bantuan seperti modal perniagaan, bantuan pendidikan, dermasiswa pengajian tinggi, peralatan persekolahan, pembangunan institusi masjid, sekolah dan bantuan rawatan perubatan, sara hidup dan lain-lain dapat disalurkan secara menyeluruh dan berterusan.



Jumlah pengagihan yang telah dilaksanakan pada tahun 2012 antaranya adalah peruntukan Fakir miskin berjumlah **RM 138 juta** Fii Sabilillah **RM 140.4 juta** Golongan Gharimin **RM 33.7 juta**, Muallaf **RM 23.8 juta**, Riqab **RM 6.9 juta**, Ibnu Sabil **RM 1.8 Juta** dan juga peruntukan kepada Amil berjumlah **RM 56.4 juta** telah diagihkan.

Sidang Jumaat yang dirahmati Allah sekalian.

Berdasarkan kepada rekod pembayar zakat di Lembaga Zakat Selangor pada tahun 2012, didapati seramai 210,307 orang telah melaksanakan kewajipan menunaikan zakat mereka dengan kutipan sebanyak **RM 451.3 juta** menunjukkan peningkatan berbanding pada tahun 2011 dengan pembayar zakat seramai 180,617 orang dengan kutipannya sebanyak **RM 394.1 juta**.

Oleh itu, marilah kita menunaikan ibadah zakat menerusi pelbagai kemudahan bayaran seperti pembayaran zakat di 24 kaunter di seluruh daerah atau melalui internet, potongan gaji, ejen bank, pos dan lain-lain lagi demi menunaikan kefardhuan yang ditetapkan oleh Allah dan membantu meningkatkan taraf ekonomi umat Islam di negara kita.

Muslimin yang dirahmati Allah sekalian,

Khatib ingin mengingatkan para jemaah sekalian perkara-perkara berikut:

1- Pastikanlah harta yang kita miliki seperti pendapatan, wang simpanan, saham, emas, perak, hasil pertanian dan penternakan serta lain-lain telah ditunaikan hak zakat ke atasnya.



2- Hendaklah istiqamah mematuhi segala perintah Allah termasuklah menunaikan ibadah zakat. Tunaikanlah zakat di institusi 'amil yang diiktiraf iaitu Lembaga Zakat Selangor, sesuai dengan matlamat dan visi kepimpinan negeri untuk menjadi negeri ini sebagai negeri yang sejahtera dan berkeadilan.

3- Berilah sepenuh kepercayaan dan keyakinan dengan menunaikan zakat di institusi amil demi memastikan wang zakat yang kita tunaikan dapat diurus dan disalurkan kepada asnaf yang berhak demi memastikan matlamat dapat dicapai dengan lebih berkesan.

4- Tunaikanlah zakat menerusi pelbagai cara pembayaran zakat di 24 kaunter seluruh negeri Selangor, melalui internet, potongan gaji, ejen bank, pos dan lain-lain lagi.

Ingatlah bahawa segala yang ada di dunia ini pasti akan binasa, hanya pahala dan dosa sahaja yang kekal sebagai bekalan kita di akhirat nanti. Oleh itu, marilah kita meraih keredhaan Ilahi dengan memperbanyakkan amal bakti di dunia yang fana ini.



وَصَدَّقَ بِالْحُسْنَىٰ



أَعُوذُ بِاللَّهِ مِنَ الشَّيْطَانِ الرَّجِيمِ  
فَأَمَّا مَنْ أَعْطَىٰ وَاتَّقَىٰ



فَسَنِّيَرُهُۥ لِلْيُسْرَىٰ

(Al-Lail : 5-7)



Adapun orang yang memberikan apa yang ada padanya ke jalan kebajikan dan bertaqwa ( mengerjakan suruhan Allah dan meninggalkan segala larangan-Nya). Serta ia mengaku dengan yakin akan perkara baik. Maka sesungguhnya Kami akan memberikan kemudahan untuk mendapat kesenangan (syurga).

بَارَكَ اللَّهُ لِي وَلَكُمْ بِالْقُرْآنِ الْعَظِيمِ،  
وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ  
الْحَكِيمِ وَتَقَبَّلَ مِنِّي وَمِنْكُمْ تِلَاوَتَهُ، إِنَّهُ هُوَ  
السَّمِيعُ الْعَلِيمُ.

أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي  
وَلَكُمْ وَلِسَائِرِ الْمُسْلِمِينَ وَالْمُسْلِمَاتِ،  
فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.





## KHUTBAH KEDUA

الْحَمْدُ لِلَّهِ الَّذِي جَعَلَنَا مِنَ الْمُسْلِمِينَ، وَرَزَقَنَا مِنَ  
الطَّيِّبَاتِ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا  
شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ.  
اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ  
وَعَلَى آلِهِ وَصَحْبِهِ وَمَنْ تَبِعَهُمْ بِإِحْسَانٍ إِلَى  
يَوْمِ الدِّينِ. أَمَّا بَعْدُ، فَيَا عِبَادَ اللَّهِ، اتَّقُوا اللَّهَ فَقَدْ  
فَازَ الْمُتَّقُونَ. قَالَ اللَّهُ تَعَالَى: إِنَّ اللَّهَ وَمَلَائِكَتَهُ  
يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ  
وَسَلِّمُوا تَسْلِيمًا. اللَّهُمَّ صَلِّ وَسَلِّمْ عَلَى سَيِّدِ  
الْمُرْسَلِينَ وَارْضَ اللَّهُمَّ عَنْ أَصْحَابِهِ وَقَرَابَتِهِ  
وَأَزْوَاجِهِ وَذُرِّيَّاتِهِ أَجْمَعِينَ. اللَّهُمَّ اغْفِرْ



لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ  
الْأَحْيَاءِ مِنْهُمْ وَالْأَمْوَاتِ، إِنَّكَ سَمِيعٌ قَرِيبٌ  
مُجِيبُ الدَّعَوَاتِ وَيَا قَاضِيَ الْحَاجَاتِ. اللَّهُمَّ إِنَّا  
نَسْأَلُكَ وَنَتَوَسَّلُ إِلَيْكَ بِنَبِيِّكَ الْأَمِينِ، وَنَسْأَلُكَ  
بِأَسْمَائِكَ الْحُسْنَى وَصِفَاتِكَ الْعُظْمَى أَنْ تَحْفَظَ  
بِعَيْنِ عِنَايَتِكَ الرَّبَّانِيَّةِ وَبِحِفْظِ وَقَايَتِكَ الصَّمَدَانِيَّةِ،  
جَلَالَةَ مَلِكِنَا الْمُعَظَّمِ سُلْطَانَ سَلَاعُورِ، سُلْطَانَ  
شَرَفِ الدِّينِ اِدْرِيسِ شَاهِ الْحَاجِ ابْنِ الْمَرْحُومِ  
سُلْطَانَ صَلَاحِ الدِّينِ عَبْدِ الْعَزِيزِ شَاهِ الْحَاجِ.  
اللَّهُمَّ أَدِمِ الْعَوْنَ وَالْهُدَايَةَ وَالتَّوْفِيقَ، وَالصِّحَّةَ  
وَالسَّلَامَةَ مِنْكَ، لِيَوْلِيِّ عَهْدِ سَلَاعُورِ، تَعَكُّو أَمِيرِ  
شَاهِ ابْنِ السُّلْطَانَ شَرَفِ الدِّينِ اِدْرِيسِ شَاهِ



الحاج في أمن وصلاح وعافية بمنك وكرمك يا  
ذاالجلال والإكرام. اللهم أطل عمرهما مصلحين  
للموظفين والرعية والبلاد، وبلغ مقاصدهما  
لطريق الهدى والرشاد.

Ya Allah, Engkaulah Tuhan yang Maha berkuasa, kami bersyukur kehadiran-Mu yang telah mengurniakan kami rahmat dan nikmat, sehingga kami dapat meneruskan usaha ke arah memperkukuhkan negara umat Islam khususnya negeri Selangor, sebagai negeri yang maju, sejahtera dan berkeadilan.

Justeru kami pohon kehadiran-Mu ya Allah, tetapkanlah iman kami, terimalah amalan kami, kukuhkanlah perpaduan kami, murahkanlah rezeki kami, kayakanlah kami dengan ilmu yang bermanfaat, suburkanlah jiwa kami dengan budi pekerti yang mulia, kembalikanlah kami ke jalan yang Engkau redhai, lindungilah kami daripada bala bencana dan ujian-Mu yang berat supaya dengan demikian, negeri kami akan sentiasa bertambah makmur dan berkat.

Ya Allah, bukannya hati kami untuk mendirikan solat fardhu lima waktu dan ibadah zakat sebagaimana yang telah Engkau wajibkan. Berkatilah hidup orang-orang yang melaksanakan tuntutan berzakat, menyayangi fakir dan miskin. Sucikanlah harta dan jiwa mereka, lindungilah



golongan fuqara' dan masakin daripada kekufuran dan kefakiran yang berpanjangan.

Demikian jua Ya Allah, tambah dan luaskanlah rezeki orang yang mewakafkan hartanya, terimalah wakaf mereka dengan ganjaran pahala yang berkekalan hingga ke hari akhirat.

رَبَّنَا هَبْ لَنَا مِنْ أَزْوَاجِنَا وَذُرِّيَّتِنَا قُرَّةَ أَعْيُنٍ  
وَأَجْعَلْنَا لِلْمُتَّقِينَ إِمَامًا. رَبَّنَا ءَاتِنَا فِي الدُّنْيَا  
حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ. عِبَادَ  
اللَّهِ، إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي  
الْقُرْبَىٰ وَيَنْهَىٰ عَنِ الْفَحْشَاءِ وَالْمُنْكَرِ وَالْبَغْيِ  
يُعِظُكُمْ لَعَلَّكُمْ تَذَكَّرُونَ ﴿٩٠﴾

فَاذْكُرُوا اللَّهَ الْعَظِيمَ يَذْكُرْكُمْ وَاشْكُرُواهُ عَلَىٰ  
نِعْمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ  
وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ.